

SAMOA

Faatulagaina o Aiaiga

VAEGA 1 FAATOMUAGA

1. Igoa puupuu ma le amataga
2. Faamatalaina o uiga o upu

VAEGA 2 FAAVAEINA MA GALUEGA TAUAVE A LE OFISA O LE LOIA SILI

3. Faavaeina, tuufaatasiga ma le Minisita e fitoitonu i ai
4. Galuega Tauave
5. Vaega

VAEGA 3 LOIA SILI MA LOIA

6. Galuega tauave a le Loia Sili
7. Tutoatasi
8. Faatonuga ma le faamatuuina atu
9. Loia

VAEGA 4 FAAFOEGA MA TUPE

10. Aga tausili, taiala faavae ma le tulafono laitiiti o amioga pulea
11. Tofiga
12. Faafaigaluegaina faavaitaimi, fesiitaiga ma feutagaiga ma le Komisi o le Aufaigaluega o Galuega a le Malo
13. Taiala mo le faafaigaluegaina
14. Totogi, alauni ma isi tuutuuga tau galuega
15. Fuafuaga autasi ma lipoti faaletausaga
16. Vaegatupe ma le sueina faasuetusi

VAEGA 5 AIAIGA ESEESE

17. Tuusaunoaga mai noataga tau le tagata
18. Tusi taiala ma tulafono laiti o faatinoga o galuega
19. Tulafono Faatonutonu
20. Teuteuga o le Tulafono o Galuega a le Malo
21. Aiaiga faasaoina ma aiaiga tau soloaiga

2013, Nu. 15

O SE TULAFONO e faavae ai le Ofisa o le Loia Sili, ina ia aiaia ai ana galuega tauave, pulega ma tupe ma aiaia ai mo isi galuega tauave, tiute tauave ma malosiaga o le Loia Sili, ma faamoemoea e fesootai i ai. [25 Iuni 2013]

UA FAIA e le Fono Aoao Faitulafono a Samoa i totonu o le Palemene ua potopoto e faapea:

VAEGA 1
FAATOMUAGA

1. Igoa puupuu ma le amataga-(1) E mafai ona taua leni Tulafono o le Tulafono o le Ofisa o le Loia Sili 2013.

(2) O leni Tulafono e amata faamamaluina i se aso ua filifilia e le Minisita.

2. Faamatalaina o uiga o upu - I totonu o leni Tulafono, ae vagana ai ua manaomia e le mataupu se isi uiga e ese ai:

“Tulafono” e aofia ai Tulafono a o lumanai ai le Tutoatasi po o so o se isi tulafono;

“Loia Sili” o lona uiga o le tagata ua tofia i lea tofiga i lalo o le Mataupu 41 o le Faavae;

“galuega tauave faale-faavae” o lona uiga o se galuega tauave, tiute tauave po o se malosiaga o le Loia Sili ua faatulaga mai i lalo o le Mataupu 41 o le Faavae;

“tulafono lautele”, e tusa ai o le galuega tauave a le Loia Sili, e aofia ai tulaga tutusa i lona faamamaluina i totonu o Samoa ma so o se isi taiala faavae faaletulafono i lalo o se faaiuga a se Faamasinoga;

“vaega” o lona uiga o se vaega o tulafono, vaega o auunaga lautele, po o se vaega e i ai noataga tutusa ma le vaega o tulafono ua faavaeina i lalo o le fuaiupu 5;

- “taiala o le faafaigaluegaina” o lona uiga o se taiala o le faafaigaluegaina ua saunia i lalo o le fuaiupu 13;
- “loia” o lona uiga o se tagata ua tofia i lea tofia i lalo o le fuaiupu 11, ma e aofia ai se tagata ua tofia i lalo o le fuaiupu 11 mo faamoemoega o le fuaiupu 3(1)(e) e tauaveina se galuega faaloia;
- “galuega faaloia” o lona uiga o se galuega faaloia e tusa ai o se galuega tauave faale-faavae, galuega tauave faaletulafono po o se galuega tauave o tulafono lautele;
- “Minisita” o lona uiga o le Palemia po o se isi Minisita ua faatonuina i lalo o le Mataupu 35 o le Faavae e feagai ma faafoega o lenei Tulafono ma le Ofisa;
- “Ofisa” o lona uiga o le Ofisa o le Loia Sili ua faavaeina e le fuaiupu 3(1);
- “aufaigaluega” o lona uiga o se tagata ofisa po o se tagata faigaluega o le Ofisa ua tofia i lalo o le fuaiupu 11, ma e aofia ai se tagata ua tofia i lalo o le fuaiupu 11 mo le faamoemoe o le fuaiupu 3(1)(e) po o ua faafaigaluegaina faavaitaimi i lalo o le fuaiupu 12;
- “galuega tauave faaletulafono” o lona uiga o se galuega tauave, tiute tauave po o se malosiaga o le Loia Sili i lalo o lenei Tulafono po o so o se isi Tulafono, ma e aofia ai se galuega tauave o le Ofisa po o se vaega o le Ofisa;

VAEGA 2

FAAVAEINA MA GALUEGA TAUAVE A LE OFISA O LE LOIA SILI

3. Faavaeina, tuufaatasiga ma le Minisita e fitoitonu i ai-(1) O lenei fuaiupu ua faavaeina ai le Ofisa o le Loia Sili (ua taua mai i totonu o le Mataupu 83(g) o le Faavae) o lo o aofia ai i latou uma ua taua e faapea:

- (a) o le Loia Sili;
- (b) faauluuluga o vaega o tulafono taitasi;
- (c) loia;
- (d) aufaigaluega tau faafoega;
- (e) so o se isi tagata ua tofia po o ua faafaigaluegaina faavaitaimi mo faamoemoega o lenei Tulafono.

(2) O tagata ua taua mai i totonu o le faafuaiupu (1)(b) e oo i le (e) e tatau ona tofia ma faafaigaluegaina e tusa ai o lenei Tulafono.

(3) O le Palemia po o se Minisita e tofia i se faiga tusitusia e le Palemia o le a fitoitonu mo le faafoega o lenei Tulafono ma le Ofisa.

4. Galuega Tauave - Ua i ai i le Ofisa ni galuega tauave e faapea:

- (a) ia pulea ma fesoasoani e faatino ni galuega tauave faale-faavae, faaletulafono ma tulafono lautele a le Loia Sili;
- (b) ia pulea galuega faaloia mo Le Ao o le Malo, Palemia, Kapeneta, Minisita, ma le Malo ma, i le noatia ma fai fuafua i le fuaiupu 6(6), i isi ofisa sooupu o le Malo;
- (c) ia tuuina atu faafoega ma fesoasoani i aiaiga tau tupe a le Ofisa;
- (d) ia tuuina atu lipoti po o faamatalaga i le Minisita e tusa ai o galuega faatino a le Ofisa;
- (e) i luga o se talosaga, ia tuuina atu fesoasoani faaloia i isi lala o le Malo.

5. Vaega-(1) E aofia ai i le Ofisa ni vaega o tulafono, vaega o auunaga lautele po o vaega e i ai noataga tutusa ma vaega o tulafono ua faavaeina i lalo o lenei fuaiupu.

(2) O vaega o tulafono ua aofia ai vaega e faapea:

- (a) o se Vaega o Mataupu Tau le Va o Tagata e faatinoina galuega tauave ua taua e faapea -
 - (i) ia faavaeina, ma faatonutonu ni tualumaga faa-faamasinoga tau le va o tagata ma isi mataupu mo le Malo, ma i le noatia ma le fai fuafua i le fuaiupu 6(6), i isi ofisa sooupu o le Malo;
 - (ii) ia puipuia ni tualumaga faa-faamasinoga tau le va o tagata e faasaga i le Malo ma, i le noatia ma le fai fuafua i le fuaiupu 6(6), i isi ofisa sooupu o le Malo;

(iii) ia tuuina atu fautuaga faaletulafono i Le Ao o le Malo, le Palemia, le Kapeneta, Minisita ma le Malo po o, i le noatia ma le fai fuafua i le fuaiupu 6(6), i isi ofisa sooupu o le Malo;

(iv) ia faatinoina isi galuega tauave ua tofia i ai e le Loia Sili po o isi galuega tauave ua faatonuina;

(b) o se Vaega o Moliaga Faaletulafono e faatinoina galuega tauave e faapea -

(i) ia faia ma faafoe taualumaga faa-faamasinoga o solitulafono;

(ii) ia tuuina atu fautuaga faaletulafono i mataupu tau solitulafono;

(iii) ia faatino isi galuega tauave ua tofia i ai e le Loia Sili po o isi galuega tauave ua faatonuina;

(c) o se Vaega e Tusia Tulafono e faatinoina galuega tauave e faapea -

(i) ia tusia tulafono a le Malo;

(ii) ia tuuina atu isi auaunaga mo le tusiaina o tulafono;

(iii) ia tuuina atu fautuaga faaletulafono i tulafono ma fuafuaga tau tulafono;

(iv) ia faatino isi galuega tauave ua tofia i ai e le Loia Sili po o isi galuega tauave faatonuina.

(3) O Vaega o Auaunaga Lautele ma Tupe ua faavaeina ina ia faatinoina galuega tauave e faapea:

(a) ia tuuina atu faafoega o le Ofisa;

(b) ia puleaina tupe a le Ofisa;

(c) ia faatinoina isi galuega tauave ua tofia i ai e le Loia Sili po o galuega tauave ua faatonuina.

(4) O le vaega e i ai noataga tutusa ma vaega o tulafono ma isi vaega o tulafono po o auaunaga lautele, e aofia ai a latou galuega tauave, e pei ona mafai ona faavaeina ai e tulafono faatonutonu.

- (5) E mafai e le Loia Sili ona:
- (a) tofia se loia e avea o faauluuluga ma vaavaaia taitasi le Vaega o Mataupu Tau le Va o Tagata, le Vaega o Moliaga Faaletulafono, ma le Vaega e Tusia Tulafono (e aofia ai so o se isi vaega faaletulafono ua faavaeina i lalo o le faafuuiupu (4)); po o
 - (b) le suia o le igoa o se vaega po o le faavaeina o ni lala laiti po o lala taitasi o se vaega, i le noatia ma le fai fuafua i le fuaiupu 19(a).

VAEGA 3 **LOIA SILI MA LOIA**

6. Galuega tauave a le Loia Sili-(1) O le Loia Sili, o le faauluuluga o le Ofisa e avea o lona Ofisa Sili o Pulega.

(2) E faaopoopo atu i galuega tauave faale-faavae, e i ai galuega tauave a le Loia Sili e faapea:

- (a) ia tuufaatasia, faatino, mataitu ma iloilo faaiuga o faiga faavae mo le Ofisa;
- (b) ia auai ma tuuina atu fautuaga i le Kapeneta;
- (c) ia pulea, vaavaaia ma faatonutonu loia, le aufaigaluega ma gaoioiga faafoe a le Ofisa, e aofia ai le faia o aoaoga mo loia ma le aufaigaluega;
- (d) ia vaavaaia loia o Matagaluega ma ofisa sooupu o le Malo, o i latou ia o lo o tauaveina ni galuega faaloia po o isi tiute faaletulafono;
- (e) afai ua talafeagai ai, ia faatonuina se loia o lo o galue faaloia tumaoti ina ia faia se galuega faaloia;
- (f) ia faatinoina galuega tauave faaletulafono ma tulafono lautele.

(3) Mo le faamoemoe o lenei Tulafono, o le Loia Sili o le tagata lea na te faafaigaluegaina tagata ua tofia po o ua faafaigaluegaina faavaitaimi i lalo o lenei Tulafono.

(4) I le faatinoina o le matafaioi a le Ofisa Sili o Pulega ma galuega tauave faale-faavae, faaletulafono ma tulafono lautele, e tatau ona fesoasoani atu faauluuluga o vaega taitasi i le Loia Sili.

(5) E lē tatau i se tagata, i lona avea ma sui o le Malo, ona faatonuina se loia o lo o galue tumaoti, po o so o se isi tagata ina ia faatinoina se galuega faaloia seia vagana ua auala atu i le Loia Sili.

(6) E mafai e se ofisa sooupu o le Malo, i se auala tusitusia, ona talosagaina le Loia Sili ina ia faia se galuega faaloia mo ia.

(7) O se galuega faaloia ua talosagaina i lalo o le faafuaiupu (6), e lē mafai ona tuuina atu pe afai ua faamalieina le Loia Sili e faapea:

- (a) o lo o i ai po o le a i ai se aia feteenai i le faia o se galuega faaloia mo le ofisa sooupu; po o
- (b) e leai ni punaoa a le Ofisa po o se mafai gafatia e faia ai le galuega faaloia.

7. Tutoatasi-(1) I le noatia ma le fai fuafua i le faafuaiupu (2), a oo ina faatinoina se galuega tauave faale-faavae, faaletulafono, po o se tulafono lautele, e lē noatia le Loia Sili i le faatonuga a se tagata seia vagana ai o le faatonuga a Le Ao o le Malo, Palemia, Kapeneta, po o se Minisita, se faamasinoga po o se faatonuga ua manaomia i lalo o se Tulafono.

(2) E lē noatia le Loia Sili ma tagata e faia moliaga faa-faamasinoga i le Vaega o Moliaga Faaletulafono (e aofia ai isi tagata ua faatagaina e le Loia Sili) i le faatonuga a so o se isi tagata (seia vagana ai so o se faatonuga a se faamasinoga) pe afai o le a faatinoina galuega tauave i lalo o le Mataupu 41 o le Faavae (e aofia ai galuega tauave faaletulafono po o tulafono lautele):

- (a) ia faia, faatonutonuina po o le faamutaina so o se taualumaga mo se tuuaiga i se soligatulafono ua faia; po o
- (b) e tusa ai i so o se mataupu e faasino i se soligatulafono po o se mataupu tau solitulafono.

8. Faatonuga ma le faamatuuina atu-(1) E mafai e le Loia Sili, i le i ai po o e aunoa ai ma se aiaiga ona:

- (a) tuuina atu ni faatonuga tusitusia mo faamoemoega o lenei Tulafono i le Ofisa, se tagata ua tofia i lalo o le fuaiupu 11 po o so o se isi tagata, e aofia ai loia o Matagaluega ma ofisa sooupu o le Malo; ma
 - (b) faamatuuina atu, i se faiga tusitusia, se galuega tauave faaletulafono i se tagata ua talafeagai le agavaa i lalo o le fuaiupu 3(1)(b) e oo i le (e).
- (2) E mafai e le Loia Sili ona:
- (a) galulue soofaatasi i se galuega tauave ua faamatuuina atu i lalo o le faafuaiupu (1)(b); ma
 - (b) suia, taofia lē tumau po o le faalēaogā se faatonuga po o le faamatuuina atu po o le suia, taofia lē tumau po o le faalēaogā se aiaiga po o le faaeeina atu o se aiaiga fou.

9. Loia-(1) E ao i le Loia Sili ona mautinoa ua atoatoa le aofaiga o loia e faatinoina galuega tauave faale-faavae, faaletulafono ma tulafono lautele.

(2) O le Tulafono o lo o faatonutonuina ai le galuega faaloia i Samoa ma tulafono faafae a le Malo i luga o le faatonutonuina o galuega faaloia a le Malo ua tuuina atu e le Kapeneta e faatatau lea i le Loia Sili ma loia, e aofia ai i latou i Matagaluega po o ofisa sooupu o le Malo.

(3) E ao i loia, e aofia ai i latou o lo o galulue i Matagaluega po o ofisa sooupu o le Malo, ona usitaia so o se faatonuga ua tuuina atu i lalo o le fuaiupu 8(1)(a).

(4) E lē tataui i le Loia Sili, ni loia, e aofia ai i latou o lo o galulue i Matagaluega po o ofisa sooupu o le Malo, ona galulue i galuega faaloia tumaoti o so o se ituaiga vagana mo galuega faaloia e ofoina fua e aunoa ma se totogi ia e lē fesootai i se galuega faaloia po o se galuega faaloia i Matagaluega po o ofisa sooupu o le Malo:

- (a) mo le Loia Sili, e pei ona faamaonia e le Palemia;
- (b) mo loia, e aofia ai i latou o lo o i Matagaluega po o ofisa sooupu o le Malo, e pei ona faamaonia e le Loia Sili.

VAEGA 4
FAAFOEGA MA TUPE

10. Aga tausili, taiala faavae ma le tulafono laitiiti o amioga pulea - Ua faaaogāina le Vaega IV o le Tulafono o Galuega a le Malo 2004, faatasi ai ma ona teuteuga faaopoopo ua talafeagai ai, i lenei Tulafono.

11. Tofiga-(1) E mafai e le Loia Sili ona tofia ni tagata i lalo o le fuaiupu 3(1)(b) e oo i le (e) e tusa ai o taiala mo tofiga.

(2) E lē tatau ona tofia se tagata e avea o se loia po o mo le faamoemoe o le fuaiupu 3(1)(e), e tauaveina se galuega faaloia seia vagana e agavaa lea tagata po o ua agavaa ina ia avea o se loia o le faamasinoga ma loia faufautua i Samoa po o i totonu o se atunuu ua aloaia i Samoa.

(3) E ao i le Loia Sili ona:

(a) faafaigaluegaina ni tagata i lalo o lenei Tulafono i lalo o konekarate o le faafaigaluegaina; ma

(b) faautagia le tala o tupe a le Ofisa pe a oo ina tofia po o le faafaigaluegaina faavaitaimi ni tagata mo le faamoemoe o lenei Tulafono.

(4) I totonu o lenei Vaega, “tofia” e aofia ai le faamaonia, toe siitia le tulaga tofi, toe faaitiitia le tulaga tofi, fesiitai, faafaigaluega faavaitaimi, toe iloilo le tulaga o le tofiga, faatonuina le amio, faamalolo lē tumau, faamuta po o le toe tofia.

12. Faafaigaluegaina faavaitaimi, fesiitaiga ma feutagaiga ma le Komisi o le Aufaigaluega o Galuega a le Malo-(1) E mafai e le Loia Sili ona:

(a) talosaga i le Komisi o le Aufaigaluega o Galuega a le Malo ina ia faafaigaluega faavaitaimi se tagata ofisa po o se tagata faigaluega o Galuega a le Malo i le Ofisa; po o

(b) i luga o se feutagaiga ma le Komisi o le Aufaigaluega o Galuega a le Malo, ona fesiitai atu se loia po o se tagata faigaluega o lona Ofisa i Galuega a le Malo.

(2) Afai o le a faamoemoe le Komisi o le Afaigaluega o Galuega a le Malo ina ia faavaeina po o le faia o se tofiga i so o se tofiga faaloia i Galuega a le Malo, e ao i le Komisi, i se faiga tusitusia, ona feutagai ma le Loia Sili.

(3) Pe a faagasolo le tualumaga o le tofiga o se tagata i se tofiga faaloia i se Matagaluega po o se ofisa sooupu o le Malo, e ao i le Komisi o le Afaigaluega o Galuega a le Malo ona valaau le Loia Sili e auai po o sona sui ua faatagaina i se faiga tusitusia e le Loia Sili:

- (a) ina ia avea o se sui auai o le laulau a faamasino e faatalanoaina lea tagata; po o
- (b) ina ia auai pe a iloiloaina e le Komisi le tofiga o le tagata.

(4) E lē faaaogāina le faafuaiupu (2) i se tofiga faaloia ua faavaeina i lalo o se Tulafono seia vagana ai ua aiaia ai i le Tulafono mo feutagaiga po o isi tualumaga.

13. Taiala mo le faafaigaluegaina-(1) E mafai e le Loia Sili ona tuuina atu taiala mo le faafaigaluegaina:

- (a) ua faatulaga mai ai tualumaga mo tofiga po o mo talosaga i mataupu o amioga pulea, o le toe faaitiitia o le tulaga, fesiitaiga, faamalolo lē tumau po o le faamutaina; ma
- (b) i isi mataupu e faatatau i le faafaigaluegaina i lalo o lenei Tulafono.

(2) Afai e leai ni taiala ua tuuina atu i lalo o le faafuaiupu (1), e ao i le Loia Sili ona faaaogā tualumaga o Galuega a le Malo.

14. Totogi, alauni ma isi tuutuuga tau galuega-(1) I le avea ai ma aiaiga e ese mai i le fuaiupu 13, e mafai e le Loia Sili:

- (a) faatasi ai ma le faamaoniga a le Kapeneta, ona fuafua totogi, alauni ma isi aiaiga tau galuega o tagata ua tofia po o ua faafaigaluegaina faavaitaimi i lalo o lenei Tulafono; po o
- (b) afai e leai se fuafuaga ua faia i lalo o le parakalafa (a), ia faaaogā totogi, alauni ma aiaiga tutusa o lo o talafeagai ai i Galuega a le Malo mo tagata ua

tofia po o faafaigaluega faavaitaimi i lalo o lenei Tulafono.

(2) Afai ua tuuina atu i tagata ofisa o Galuega a le Malo ni siitaga lautele o totogi po o alauni, o totogi po o alauni o tagata ua tofia po o ua faafaigaluega faavaitaimi i lalo o lenei Tulafono, e ao ona siitia e tusa ai o lea tulaga.

15. Fuafuaga autasi ma lipoti faaletausaga-(1) E ao i le Loia Sili ona mautinoa e faapea:

(a) ua saunia se fuafuaga autasi mo le Ofisa, e tusa ai o manaoga tutusa o lo o faaaogā i ofisa sooupu o le Malo; ma

(b) ua saunia se lipoti faaletausaga e faatulaga mai ai gaioioiga a le Ofisa i totonu o se tausaga.

(2) E ao i le Loia Sili ona auina atu le lipoti faaletausaga i le Minisita, o ia lea e ao, i se taimi vave lava e mafai ai ona faia, ona tuuina atu le lipoti i le Fono Aoaofaitulafono e tusa ai ma ana Tulafono Tumau.

16. Vaegatupe ma le sueina faasuetusi-(1) E ao i le Malo ona mautinoa ua atoatoa lelei vaegatupe mo le Ofisa e pei ona faatatauina i ai e le Palemene.

(2) Afai ua talafeagai ai ona faia faapea, e mafai ona faia tulafono faatonutonu i lalo o le fuaiupu 19 ina ia tuuina mai ai se vaegatupe mo le Ofisa lea e mafai ona totogiina atu i ai vaegatupe i lalo o le faafuaiupu (1) ma isi vaegatupe ua faatonuina.

(3) Ua faaaogāina le Tulafono o le Pulega o Tupe a le Malo 2001 ma le Tulafono o le Ofisa o le Suetusi 1961 i vaegatupe i lalo o le faafuaiupu (1) po o le (2) o lenei fuaiupu po o tupe a le Malo ua maua mai e le Ofisa.

VAEGA 5 **AIAIGA ESEESE**

17. Tuusaunoaga mai noataga tau le tagata - E lē noatia le Minisita, o le Loia Sili po o se tagata ua tofia po o ua faafaigaluegaina faavaitaimi i lalo o lenei Tulafono, i se noataga

tau le tagata, ona o le faatinoina po o ona ua lē mafai ona faatino i le agaga lelei se galuega tauave faale-faavae, faaletulafono, po o tulafono lautele.

18. Tusi taiala ma tulafono laiti o faatinoga o galuega - E mafai e le Loia Sili ona tuuina atu:

- (a) tusi taiala o le faatinoga o galuega i so o se itu o le galuega faaloia; po o
- (b) tulaga faataatitia ma tulafono laiti o le faatinoga o galuega mo le faamoemoe o lenei Tulafono.

19. Tulafono Faatonutonu - E mafai e Le Ao o le Malo, i luga o le fautuaga a le Kapeneta, ona faia ni tulafono faatonutonu ina ia aloaia ai po o mo faamoemoega o lenei Tulafono, ma e faapitoa lava ona mafai ona faia ai tulafono faatonutonu e faapea:

- (a) ina ia teuteu ai galuega tauave po o le igoa o se vaega;
- (b) ina ia faatonuina ai mataupu e faasino i le fuafuaga autasi, lipoti faaletausaga ma so o se isi lipoti e mafai ona manaomia i lalo o lenei Tulafono;
- (c) ina ia faavaeina ai se faaputugatupe o mavaega tausī mo le Ofisa i lalo o le fuaiupu 16, ma e mafai ona aofia ai isi vaegatupe e ao ona totogiina i le faaputugatupe tausī ma le faiga e faaaogāina ai ia vaegatupe;
- (d) e tagofia ai mataupu ua manaomia ona faatonuina i lalo o lenei Tulafono.

20. Teuteuga o le Tulafono o Galuega a le Malo - Mo le fuaiupu 3 o le Tulafono o Galuega a le Malo 2004, i le faamatalaga o le uiga o upu “Pulega faale Faavae”, ia soloia le parakalafa (a).

21. Aiaiga faasaoina ma aiaiga tau soloaiga-(1) I le amata faamamaluina ai o lenei Tulafono, o loia o lo o i ai nei ma isi afaigaluega o le Ofisa ua tofia po o galulue faakonekarate i Galuega a le Malo, e faaauau pea o latou tofiga, konekarate ma

tuutuuga o le faafaigaluegaina ma ua avea e pei ua tofia po o ua galue faakonekarate i lalo, ma i le noatia ma fai fuafua i lenei Tulafono.

(2) E mafai e le Loia Sili, i totonu o le 12 masina mai le amataga o le faamamaluina o lenei Tulafono, ona tuuina atu faatonuga tusitusia e tagofia ai isi mataupu tau soloaiga e mafai ona manaomia i se gaoioiga tau tulafono.

(3) O le Ofisa Tutotonu o le Vaega o le Tulafono ma le Amiotonu o le Ofisa sa i ai i le amataga o lenei Tulafono ua avea o se vaega e i ai noataga tutusa faaletulafono ua faavaeina i lalo o le fuaiupu 5(4) seia oo ina faalēaogāina po o le siitia atu i se isi Matagaluega e le Loia Sili, e ala i se faasilasilaga i le Savali.

**O le Tulafono o le Ofisa o le Loia Sili 2013
o lo o faafoeina e le Ofisa o le Loia Sili.**

**Lolomiina e le Failautusi o le Fono Aoaofaitulafono,
i le pule a le Fono Aoaofaitulafono.**